

NTU lancar Pakej Bantuan \$2j bagi pelajar atasi kesan Covid-19

PELAJAR Universiti Teknologi Singapura (NTU) yang menghadapi cabaran pembelajaran atau kewangan ekoran wabak Covid-19 kini boleh mendapatkan bantuan universiti itu setelah ia melancarkan pakej bantuan menerusi program kedermawanan privet.

Ini termasuk dana bernilai \$2 juta bagi pelajar NTU warga setempat dan penduduk tetap.

Dalam kenyataan semalam, NTU berkata bantuan bagi golongan terjejas itu merangkumi tiga langkah.

Skim-skim bantuan tersebut dibiaya sumber universiti itu sendiri termasuk sumber kewangan sedia ada dari pihak awam dan juga hadiah pendermawanan privet.

Tambah kenyataan itu, presiden NTU, Encik Subra Suresh dan isterinya, Cik Mary Suresh akan menghadiahkan sebanyak \$100,000 untuk memulakan dana tersebut.

Antara langkah yang dilancarkan adalah dana bernilai \$2 juta untuk membantu pelajar warga setempat dan penduduk tetap yang memerlukan bantuan segera.

Dana itu, yang dinamakan Dana OneNTU akan menawarkan bantuan wang tanpa faedah pendahuluan bernilai \$1,500 yang boleh dibayar sehingga dua tahun setelah tamat pembelajaran.

Satu lagi dana bertujuan menawarkan bantuan kewangan kepada

golongan pelajar dari Singapura dan dari luar negara yang amat memerlukan ekoran Covid-19.

Dana itu, yang dinamakan Dana Keutamaan NTU ingin membantu mereka yang terjejas teruk akibat kesan wabak dan tiada sumber bantuan lain. Ia dibiayai kedermawanan privet.

Penerima dana akan berjanji membayar balik wang yang dihulurkan tanpa faedah itu kepada NTU, dalam masa dua tahun setelah tamat pengajian.

Keutamaan akan diberi kepada pelajar sepenuh masa universiti itu dan pelajar boleh mendaftar dalam talian untuk mendapatkan bantuan.

Jenis dan jumlah bantuan kewangan bergantung kepada keadaan dan keperluan pelajar.

Selain kededua dana itu, NTU juga akan membantu pelajar akhir tahun Doktor Falsafah (PhD) dan sarjana yang menghadapi kesukaran menyelesaikan kajian.

Ini disebabkan gangguan ekoran langkah penutupan makmal dan sekolah.

NTU akan lanjutkan tempoh pencalonan PhD mereka termasuk mengetepikan yuran tuisyen sehingga satu semester.

Ia juga merangkumi pelajar PhD dan sarjana yang mempunyai biasiswa akhir tahun NTU dan semua pelajar kajian yang sedang menduduki tahun pencalonan terakhir.